



SLUŽBA ZA REVIZIJU FINANSIRANJA POLITIČKIH STRANAKA

Na osnovi člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2010. GODINU I POSTIZBORNOG FINANSIJSKOG IZVJEŠTAJA – OPĆI IZBORI 2010. **SOCIJALISTIČKE PARTIJE**

Broj: 03-07-6-456/11
Sarajevo, 16. maj 2012. godine

SADRŽAJ:

MIŠLJENJE.....	2
1. UVOD.....	3
2. PREDSTAVLJANJE POLITIČKE STRANKE.....	3
3. OPIS REVIZIJE.....	4
Predmet revizije.....	4
Cilj revizije.....	4
Obim revizije.....	4
4. PRETHODNE REVIZIJE.....	4
5. NALAZI I PREPORUKE.....	5
5.1. NALAZI.....	5
5.2. PREPORUKE.....	10

MIŠLJENJE

Služba za reviziju finansiranja političkih stranaka izvršila je reviziju finansijskih izvještaja Socijalističke partije i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka i članom 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Socijalistička partija u izvještajnom periodu nije postupila u skladu sa odredbama člana 4. stav (2), člana 6., člana 8. stav (1) i člana 11. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Socijalistička partija u 2010. godini postupala u skladu sa odredbama Zakona o finansiranju političkih stranaka i člana 15.10 Izbornog zakona BiH.

1. UVOD

Služba za reviziju finansiranja političkih stranaka izvršila je reviziju finansijskih izvještaja Socijalističke partije i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2010. godine.

Revizija je preduzeta u skladu sa članom 14. stav (1) Zakona o finansiranju političkih stranaka, članom 24. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Socijalistička partija ostvarila je ukupne prihode u iznosu od 667.107,20 KM¹, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk.prih. %
1	Članarina	27.071,45	4,06%
2	Prilozi fizičkih lica	264.003,00	39,57%
3	Prilozi pravnih lica	27.737,78	4,16%
4	Prihodi od imovine	91,05	0,01%
5	Prihodi od pravnih lica	0,00	0,00%
6	Prihodi od poklona	600,00	0,09%
7	Prihodi iz budžeta	347.603,92	52,11%
	Ostali prihodi:		0,00%
	Ukupni prihodi:	667.107,20	100,00%

U godišnjem finansijskom izvještaju Socijalistička partija je iskazala ukupne rashode u iznosu od 1.006.170,91 KM².

2. PREDSTAVLJANJE POLITIČKE STRANKE

Naziv političke stranke: Socijalistička partija. Skraćeni naziv stranke je SP.

Stranka je Rješenjem broj: Rp-13-1/93 od 20.07.1993. godine upisana u registar političkih organizacija kod Osnovnog suda u Banjaluci pod nazivom: "Socijalistička partija Republike Srpske". Rješenjem Osnovnog suda u Banjaluci, broj: Rp-12/02 od dana 06.02.2006. godine, izmijenjen je naziv političke stranke, koji sada glasi: "Socijalistička partija".

Sjedište političke stranke je u Banjaluci, ulica Jovana Dučića br. 25.

¹ Podaci sa ispravljenog obrasca 3 (ukupni prihodi) političke stranke, koji je dostavljen dana 14.05.2012. godine.

² Podaci sa ispravljenog obrasca 4 (ukupni rashodi) političke stranke) godišnjeg finansijskog izvještaja za 2010. godinu, koji je dostavljen dana 08.05.2012. godine.

Lice ovlašteno za zastupanje stranke je Petar Đokić, predsjednik i Slobodan Protić, izvršni sekretar. Lice ovlašteno za podnošenje finansijskih izvještaja za 2010. godinu je Jelena Četković.

Prema podacima iz godišnjeg finansijskog izvještaja za 2010. godinu, organizacionu strukturu Socijalističke partije čine:

- Glavni odbor,
- Gradski odbor Banja Luka i
- 62 općinska odbora.

3. OPIS REVIZIJE

Predmet revizije su godišnji finansijski izvještaj za 2010. godinu i postizborni finansijski izvještaj – Opći izbori 2010. godine Socijalističke partije, i to sljedećih organizacionih dijelova:

- Glavni odbor SP Banja Luka,
- Općinski odbor SP Brčko,
- Općinski odbor SP Bijeljina, i
- Općinski odbor SP Teslić i organizacioni dio Teslić–Turnir.

Cilj revizije je da revizoru omogući da izrazi mišljenje o tome da li je Socijalistička partija u izvještajnom periodu postupala u skladu sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine.

Obim revizije finansijskih izvještaja Socijalističke partije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka i člana 15.10 Izbornog zakona Bosne i Hercegovine, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode iz budžeta i troškove kampanje.

4. PRETHODNE REVIZIJE

Služba za reviziju je obavila reviziju i pregled finansijskih izvještaja Socijalističke partije za period od 2004. do 2009. godine, nakon čega su izdati izvještaji o reviziji, odnosno izvještaji o pregledu sa mišljenjem revizora, nalazima revizije i preporukama.

Nakon izvršenog pregleda za 2009. godinu, Služba za reviziju je izdala Izvještaj o pregledu godišnjeg finansijskog izvještaja Socijalističke partije sa mišljenjem revizora, nalazima revizije i preporukama da stranka treba postupati u skladu sa odredbama člana 8. stav (1) i člana 11. stav (1) i stav (3) Zakona o finansiranju političkih stranaka.

Nerealizirane preporuke:

Na osnovi uočenih nedostataka u godišnjem finansijskom izvještaju za 2010. godinu, utvrđeno je da Socijalistička partija nije ispoštovala preporuke iz Izvještaja o pregledu godišnjeg finansijskog izvještaja za 2009. godinu, odnosno i dalje postupa suprotno odredbama člana 8. stav (1) i člana 11. stav (1) i stav (3) Zakona o finansiranju političkih stranaka.

5. NALAZI I PREPORUKE

5.1. NALAZI

a) **Socijalistička partija prekršila je odredbe člana 6.³ i člana 4. stav (2)⁴ Zakona o finansiranju političkih stranaka.**

- (1) Socijalistička partija u svom finansijskom izvještaju nije iskazala nenovčanu donaciju Udruženja "ART PULS", tj. Ženskog kamernog hora "Banjalučanke", čime su prekršene odredbe člana 6. Zakona o finansiranju političkih stranaka.

Na osnovu izjave utvrđeno je da je ovaj hor učestvovao u umjetničkom programu Konvencije Socijalističke partije i Partije ujedinjenih penzionera, bez naknade.

Također je utvrđeno da stranka u svojoj dokumentaciji ne posjeduje račun, odnosno dokaz o iznosu naknade za učešće u umjetničkom programu koju bi stranka platila da je imala obavezu da plati, čime su prekršene i odredbe člana 4. stav (2) Zakona o finansiranju političkih stranaka.

Na osnovi dostupnih informacija iz štampanih medija utvrđeno je da je u umjetničkom programu Konvencije i tokom predizborne kampanje za Opće izbore 2010. godine, učestvovala i Grupa "Legende".

Uvidom u obrazac 3-e (nenovčane donacije i prilozi koje stranka nije imala obavezu da plati) godišnjeg finansijskog izvještaja utvrđeno je da Socijalistička partija nije prijavila nenovčanu donaciju u vidu besplatnog učešća Grupe "Legende", čime je prekršila odredbe člana 6. Zakona o finansiranju političkih stranaka. S obzirom da stranka ne posjeduje račune niti drugu dokumentaciju o vrijednosti tih nenovčanih donacija, prekršene su i odredbe člana 4. stav (2) Zakona o finansiranju političkih stranaka.

- (2) Organizacioni odbor Teslić–Turnir u svojoj dokumentaciji ne posjeduje račune ili ugovore sa fizičkim licima za usluge (suđenje utakmica, izrada biltena, redarska služba) u ukupnom iznosu od 1.100,00 KM, čime su prekršene odredbe člana 4. stav (2) Zakona o finansiranju političkih stranaka.

b) **Socijalistička partija prekršila je odredbe člana 8. stav (1) Zakona o finansiranju političkih stranaka.⁵**

Na osnovi pregleda dodatne dokumentacije, utvrđeno je da su sljedeći odbori Socijalističke partije koristili bez naknade prostorije općinskih organa uprave:

³ Član 6. stav (1) Politička stranka dužna je voditi evidenciju o svojim priložima fizičkih i pravnih lica, te izdati potvrdu fizičkom i pravnom licu od kojeg je primila prilog. Član 6. stav (2) Ako ukupni iznos priloga jednog lica iz stava (1) člana 4. ovog zakona premašuje 100,00 KM, ta uplata mora da se unese u finansijski izvještaj u skladu sa članom 11. Zakona o finansiranju političkih stranaka

⁴ Članom 4. stav (2) je propisano da pravno lice koje stranci pruži uslugu ili proda proizvod mora stranci da ispostavi račun, bez obzira na to snosi plaćanje usluge ili proizvoda, odnosno, bez obzira na to da li je usluga pružena ili proizvod dat bez naplate.

⁵ Državni, entitetski i kantonalni organi, organi Brčko Distrikta BiH, organi općinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

- Općinski odbor SP Mrkonjić Grad je koristio bez naknade poslovne prostorije Općine Mrkonjić Grad, površine 10,40 m². Prema podacima koje je dostavila Općina Mrkonjić Grad, prostorije su stranci date na korištenje bez naknade radi osiguranja optimalnih uvjeta za rad kluba odbornika.

- Općinski odbor SP Nevesinje je koristio prostorije Općine Nevesinje, bez plaćanja naknade. Prostorije su dodjeljene na ime kluba odbornika, a stranka ih koristi i za svoj rad.

c) Revizijom je utvrđeno da je Socijalistička partija prekršila odredbe člana 11. stav (1) i stav (3) Zakona o finansiranju političkih stranaka.

Na osnovi obavljene revizije utvrđeno je da Socijalistička partija nije vodila potpune evidencije o svojim prihodima i rashodima i nije obrasce godišnjeg finansijskog izvještaja popunila u skladu sa odredbama Pravilnika o godišnjim finansijskim izvještajima političkih stranaka, čime je prekršila odredbe člana 11. stav (1) i stav (3) Zakona o finansiranju političkih stranaka.

(1) Revizijom finansijskih izvještaja utvrđeno je da Socijalistička partija nije uspostavila knjigovodstvene evidencije u skladu sa zakonskim propisima.

- Uvidom u poslovne knjige Glavnog odbora Socijalističke partije Banja Luka utvrđeno je da stranka nema pravilno uspostavljene evidencije o osnovnim sredstvima, rashodima i obavezama.

Služba za reviziju je utvrdila da Glavni odbor SP nije evidentirao sve rashode i obaveze nastale u 2010. godini, tako da ni troškovi ni obaveze iskazane u poslovnim knjigama ne odgovaraju stvarnom stanju.

Revizijom je utvrđeno i da stranka u svojim poslovnim knjigama nije evidentirala troškove takse za prijavu za učešće na Općim izborima 2010. godine u iznosu od 5.000,00 KM⁶.

Ističemo da je stranka u obrascu 4-1 navela da su troškovi bruto plata iznosili 86.340,69 KM, a da u okviru glavne knjige nema potpune analitičke evidencije o troškovima bruto plata i obavezama po osnovi ličnih primanja i poreza i doprinosa na lična primanja.

Glavni odbor Socijalističke partije ne vodi analitičke evidencije o svojim obavezama prema fizičkim licima po osnovi posudbi. Stranka ove obaveze u svojim poslovnim knjigama vodi u ukupnom iznosu od 49.547,30 KM.

Isto tako, uvidom u poslovne knjige utvrđeno je da Glavni odbor SP Banja Luka ima obaveze prema pravnom licu "Telekomunikacije RS" u iznosu od 50.995,77 KM, dok obaveze po osnovu fiksnog telefona Glavnog odbora SP na dan 31.12.2010. godine iznose 610,62 KM. Službi za reviziju nisu dostavljeni podaci o obavezama prema "Telekomunikacijama RS" po osnovu mobilnih telefona. Imajući u vidu da je Socijalistička partija nije vršila redovan popis svojih obaveza, odnosno da u svojim poslovnim knjigama ne vodi potpune evidencije o svojoj obavezama po osnovu PTT usluga, mišljenja smo da Socijalistička partija ne iskazuje tačne obaveze prema dobavljaču.

⁶ Prilikom prijave za Opće izbore 2010. godine stranka je na račun Ministarstva finansija i trezora Bosne i Hercegovine uplatila sredstva u iznosu od 30.000,00 KM. U skladu sa propisima i izbornim rezultatima, stranci su vraćena sredstva u iznosu od 25.000,00 KM, dok razlika od 5.000,00 KM čini troškove koje je stranka u svojim poslovnim knjigama i finansijskom izvještaju trebala iskazati.

Uvidom u obrasce Postizbornog finansijskog izvještaja-Opći izbori 2010. godine utvrđeno je da je Socijalistička partija iskazala troškove propagande u ukupnom iznosu od 159.615,92 KM, dok su troškovi izborne kampanje u godišnjem finansijskom izvještaju iskazani u iznosu od 468.065,93 KM, što ukazuje na činjenicu da su evidencije o troškovima kampanje bile neblagovremene i nepotpune.

- Revizijom finansijskih izvještaja je utvrđeno da Općinski odbor SP Brčko ne vodi poslovne knjige u skladu sa zakonskim propisima već vodi evidencije o prihodima, rashodima i prometu gotovine. Takođe je utvrđeno da evidencije koje je stranka vodila o prihodima i rashodima nisu tačne, niti odgovaraju podacima koji su iskazani u finansijskim izvještajima koji su dostavljeni Centralnoj izbornoj komisiji BiH.

Rashodi su evidentirani u momentu plaćanja obaveza, a ne u momentu kada su nastali.

Uvidom u blagajničke izvještaje utvrđeno je da stranka nije pravilno vodila evidencije o uplatama i isplatama gotovine putem blagajne, što za rezultat ima pogrešno iskazane prihode, odnosno pogrešno iskazan promet novčanih sredstava putem blagajne.

Služba za reviziju je utvrdila i da je stranka vršila isplatu sredstava na osnovu nepotpune dokumentacije (npr. računi, obračuni primanja i sl.). OO SP Brčko je za potrebe predizborne kampanje izvršio isplatu naknada fizičkim licima za lijepljenje plakata, iznajmljivanje bine i razglasa i sl. Ova sredstva sa poreskog aspekta imaju karakter ličnih primanja, te su oporeziva, što ovaj odbor nije obračunao, ni u svojim poslovnim knjigama evidentirao.

- Općinski odbor SP Bijeljina nije pravilno i na osnovu validne dokumentacije evidentirao troškove u svojim poslovnim knjigama. Služba za reviziju je utvrdila da je ovaj odbor u svojim poslovnim knjigama evidentirao troškove električne energije u većem iznosu od iznosa računa u 2010. godini, odnosno iskazao je i troškove električne energije iz ranijih godina. Takođe je utvrđeno da je stranka u izvještajnom periodu isplatila na ime korištenja vlastitog vozila u službene svrhe sredstva u iznosu od 6.667,87 KM. Obzirom da ovaj općinski odbor nema zaposlene⁷, isplate fizičkim licima za korištenje vlastitih vozila u službene svrhe sa poreskog aspekta imaju karakter ličnih primanja, te su oporeziva, što ovaj odbor nije obračunao, ni u svojim poslovnim knjigama evidentirao.

- Služba za reviziju je, takođe, utvrdila i da je OO SP Teslić obaveze u svojim poslovnim knjigama evidentirao u momentu plaćanja, a ne u momentu nastanka obaveza, kao i da u okviru glavne knjige ne iskazuje obaveze prema dobavljačima. OO SP Teslić je u svojim poslovnim knjigama za 2010. godinu evidentirao i troškove iz 2009. godine. Takođe je utvrđeno da su isplate iz blagajne i evidentiranje poslovnih promjena u poslovnim knjigama vršene bez validne dokumentacije, te da je promet ulaza i izlaza putem blagajne evidentiran u većem iznosu od ostvarenog.

(2) Služba za reviziju je utvrdila da Glavni odbor Socijalističke partije nije režijsko-administrativne i ostale troškove u obrascu 4-1 iskazao po vrstama troška, čime su prekršene odredbe člana 21. Pravilnika o godišnjim finansijskim izvještajima političkih stranaka.

(3) Revizijom je utvrđeno da OO SP Brčko nije režijsko-administrativne i ostale troškove pravilno iskazao u obrascu 4-1 godišnjeg finansijskog izvještaja.

Uvidom u izvode sa transakcijskog računa ovog odbora utvrđeno je da je stranka izvršila plaćanje depozita za učešće na tenderu za dodjelu poslovnog prostora na transakcijski račun

⁷ Prema podacima iz poslovnih knjiga OO SP Bijeljina nema iskazane troškove bruto plata

Brčko Distrikta BiH u iznosu od 2.184,00 KM⁸, što je OO SP Brčko u obrascu 4-1 iskazao kao trošak depozita. Takođe je utvrđeno da je na transakcijski račun OO SP Brčko, dana 08.06.2010. godine, izvršen povrat sredstava u istom iznosu.

Obzirom da u izvještajnom periodu nije došlo do odliva sredstava, odnosno da stranka nije imala troškove u iznosu od 2.184,00 KM, mišljenja smo da su troškovi OO SP Brčko pogrešno iskazani za 2.184,00 KM.

- (4) OO SP Teslić je u obrascu 4-2 (troškovi propagande) iskazao i troškove iz 2009. godine u iznosu od 649,35 KM, čime je prekršio odredbe člana 22. Pravilnika o godišnjim finansijskim izvještajima političkih stranaka.

Uvidom u račun SZGR-Štamparija "GRAFOSTIL" br. 55/09 od 26.12.2009. godine utvrđeno je da se radi o nabavci kalendara i reklamnog materijala. Obzirom da se u obrazac 4-2 unose troškovi propagande, a da je Socijalistička partija učestvovala na Općim izborima 2010. godine, smatramo da je stranka u ovaj obrazac trebala iskazati samo troškove koji se odnose na troškove kampanje za 2010. godinu.

- (5) Služba za reviziju je utvrdila da Glavni odbor Socijalističke partije ne vodi evidencije o svojim obavezama, odnosno ne posjeduje dokumentaciju o obavezama po osnovu pozajmica od fizičkih lica.

Naime, SP je u obrascu 5 iskazala ukupne obaveze prema fizičkim licima po osnovu pozajmica u iznosu od 49.547,30 KM. Tokom obavljanja revizije, Službi za reviziju su dostavljene pojedinačne priznanice iz 2003. godine po kojima je Socijalistička partija od šest (6) fizičkih lica primila sredstva po osnovu pozajmica u iznosu od 57.685,00 KM. Uvidom u pojedinačne priznanice, utvrđeno je da su tri fizička lica dala pozajmice stranci u iznosima većim od limita na visinu priloga fizičkih lica, odnosno u iznosima od 10.000,00 i više. Socijalistička partija nije tokom obavljanja revizije predočila ugovore o pozajmicama sa ovim fizičkim licima, niti dokumentaciju iz koje se nesumnjivo može utvrditi iznos obaveza prema ovim licima.

Na osnovu svega navedenog, možemo konstatovati da revizijom nije utvrđeno da obaveze po osnovu pozajmica koje su iskazane u godišnjem finansijskom izvještaju odgovaraju stvarnim obavezama Socijalističke partije.

- OO SP Brčko nije u obrascu 5 iskazao obavaze sa stanjem na dan 31.12.2010. godine, što je suprotno odredbama člana 23. Pravilnika o godišnjim finansijskim izvještajima političkih stranaka. Revizijom je utvrđeno da OO SP Brčko nije iskazao obaveze prema dobavljaču "Telekomunikacije RS" a.d. Banja Luka na dan 31.12.2010. godine u iznosu od 654,37 KM, odnosno prema JP "Komunalno Brčko" d.o.o. Brčko po osnovu električne energije Distrikt BiH u iznosu od 448,94 KM.
- Takođe je utvrđeno da stranka u obrascu 5 nije iskazala obaveze općinskih odbora Derventa, Čelinac i Osmaci na dan 31.12.2010. godine.

Uvidom u Bilans stanja OO SP Derventa na dan 31.12.2010. godine utvrđeno je da ukupne obaveze ovog odbora iznose 3.284,00 KM, što je stranka u skladu sa odredbama člana 23. Pravilnika o godišnjim finansijskim izvještajima trebala iskazati u obrascu 5.

⁸ Izvod br. 13 od 29.04.2010. godine

OO SP Čelinac nije iskazao obaveze po osnovu zakupnine u iznosu od 432,00 KM, koje prema dopisu Općine Čelinac na dan 31.12.2010. godine iznose 432,00 KM.

OO SP Osmaci nije iskazao obaveze po osnovu zakupa poslovnih prostorija za 2010. godinu prema Općini Osmaci u iznosu od 300,00 KM.

Troškovi predizborne kampanje

Socijalistička partija je postupila u skladu sa odredbama člana 15.10 Izbornog zakona BiH, odnosno u svrhu izborne kampanje je potrošila 467.416,58 KM⁹.

Prema odredbama člana 15.10 Izbornog zakona BiH politička stranka za potrebe izborne kampanje ne smije potrošiti više od 0,30 odnosno 0,20 KM¹⁰ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Socijalistička partija je u svrhu izborne kampanje mogla da potroši 1.031.035,40 KM.

5.2. PREPORUKE

Preporučuje se Socijalističkoj partiji da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 4. stav (2), člana 6., člana 8. stav (1) i člana 11. stav (1) i stav (3) Zakona o finansiranju političkih stranaka, i to:*
 - *da obezbijedi odgovarajuću dokumentaciju (račune) za usluge pružene stranci,*
 - *da u finansijskom izvještaju prijavljuje sve priloge pravnih i fizičkih lica iznad 100 KM,*
 - *da se ne finansira zabranjenim priložima,*
 - *da vodi evidencije o svojim prihodima i rashodima, i*
 - *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka .*
- *da prihode i rashode priznaje u momentu njihovog nastanka, a ne u momentu naplate ili plaćanja,*
- *da u skladu sa zakonskim propisima vrši redovan popis na dan 31.12. svake godine, i*
- *da ustroji upravljanje gotovinom putem blagajne i uvede obavezu vođenja blagajničkih izvještaja na dnevnom nivou uz obavezne priloge (nalog uplate i nalog isplate; dokumenta na osnovu kojih se vrše isplate putem blagajne). Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma .*

⁹ SP je u obrascu 4-2 godišnjeg finansijskog izvještaja za 2010. godinu, koji je dostavljen 08.05.2012. godine, iskazao troškove propagande u iznosu od 468.065,93 KM. Takođe je utvrđeno da je OO SP Teslić iskazao veće troškove propagande za 649,35 KM.

¹⁰ Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika općine odnosno gradonačelnika i za članove skupštine općine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

Imajući u vidu da je i u prethodnim izvještajima o pregledu i reviziji Služba za reviziju dala preporuke za otklanjanje utvrđenih nepravilnosti, a da politička stranka nije ispoštovala date preporuke, preporučujemo Socijalističkoj partiji da u što kraćem roku:

- *uspostavi adekvatne knjigovodstvene evidencije, odnosno da vodi poslovne knjige u skladu sa zakonskim propisima, kao pretpostavku za pravilno finansijsko izvještavanje,*
- *utvrdi stvarno stanje svojih obaveza prema dobavljačima i fizičkim licima po osnovu pozajmica, i provede odgovarajuća knjiženja u svojim poslovnim knjigama. Da sa fizičkim licima za koja se utvrdi da ima obaveze po osnovu pozajmica sklopi ugovore o pozajmici, i*
- *izvrši popis imovine (opreme i inventara) i provede odgovarajuća knjiženja u poslovnim knjigama.*

KOMENTAR:

Nakon što joj je dostavljen Preliminarni izvještaj o reviziji godišnjeg finansijskog izvještaja za 2010. godinu i postizbornog finansijskog izvještaja-Izbori 2010., Socijalistička partija je Centralnoj izbornoj komisiji Bosne i Hercegovine dostavila ispravljene obrasce godišnjeg finansijskog izvještaja za 2010. godinu, čime je djelimično otklonila nedostatke u finansijskom izvještaju.

U skladu sa odredbama člana 13. stav (3) Zakona o finansiranju političkih stranaka i preporukama Službe za reviziju, Socijalistička partija je u aprilu i maju 2012. godine izvršila povrat priloga pravnim licima, koje je prikupila tokom 2010. godine suprotno odredbama člana 8. stav (2) Zakona o finansiranju političkih stranaka, u ukupnom iznosu od 9.200,00 KM.

Služba za reviziju je sve argumentovane primjedbe Socijalističke partije uvažila i u tom dijelu izmijenila nalaze.

Zahvaljujemo se licu ovlaštenom za finansijske izvještaje i zaposlenim u Glavnom odboru i općinskim odborima Socijalističke partije čiji su finansijski izvještaji bili predmet revizije na dobroj i korektnoj saradnji tokom obavljanja revizije finansijskih izvještaja.

Hasida Gušić – šefica Službe za reviziju

Sanja Čabrilo – revizorica

Veliborka Kenjić – revizorica